



La dirigenta Maria Capeder ed igl chor d'infants La Bargeda gronda en turnos l'emda passada dalla pössa d'anviern per far l'emprema prova a Savognin.

FOTOGRAFIA TONI VINZENS

Anavos cun «99 Luftballons»

La Bargeda gronda, igl chor d'infants dalla Scuola da musica Grischun Central, è turnada l'emda passada dalla pössa d'anviern. A chella caschung è la FMR visito l'emprema prova dalla premaveira ainten la Sala Grava a Savognin – ed è dumbro igls balluns.

TONI VINZENS/FMR

Na, gl'è betg sto 99 balluns agl horizonz – scu tg'igl è nom ainten la canzung famosa da Nena – mabagn 21 ainten la Sala Grava a Savognin. Siva la pössa d'anviern è l'ò numnadaint stada mesemda sivamezde l'emprema

prova da La Bargeda gronda, igl chor d'infants per giovnas e giovens cantadours tranter diesch e quottordesch onns dalla Scuola da musica Grischun Central.

Ed igls balluns, chels on las 20 scolaras e scolars e lour dirigenta Maria Capeder (44) duvro per neir an muvimaing, cantar aint e sa prepara

ra per – exactamaing – la canzung «99 Luftballons» tgi vigna a far part agl repertori variu da La Bargeda gronda.

I plai (bunamaing) tot

Scu tgi Maria Capeder ò numnadamaing detg, canta ella cun igl sies chor d'infants en po digl tot: «Nous cantagn sa tgescha er canzungs rumantschas e chellas tradiziunalas scu per exaimpel «In siemi» da Gion Balzer Casanova, ma vagn er amprandia englesas e pi modernas scu «Hallelujah» da Leonard Cohen.» E per Nadal vegia La Bargeda gronda per exaimpel canto «Igl pitschen schumbrader» u «Mistletoe» da Justin Bieber.

Arisguard igl repertori dattigl dantant tar las giovnas ed igls giovens cantadours ena clera preferentscha, aglimanc tenor Nevio Sonder (11), Lia Denarmels (12) ed Anna Laura Sonder (13): «Las canzungs rumantschas na cantaina betg schi gugent scu las englesas.» Els prefereschon las modernas, damai chellas englesas – schibagn tg'els cantan er canzungs rumantschas pi actualas scu «Bartaccour» da Nina Mayer e Sidonia Caviezel.

Avant l'emprema prova dalla premaveira na pon els treis schiglio far nigina critica: «I plai tot!» Tgi detta forsà tuttegnia l'egna ni l'otra tgosca pi pac plasevella, ò dantant agiunto la dirigenta: «Cuncheigl tgi nous vagn relativ pacas provas per minga project, pogl dar en po squitsch da taimp avant igls concerts.»

Dus puncts culminonts

Pinavant constatescha dantant er Maria Capeder: «Igl infants en mutivos e gioldan la cuminanza. Chegl fò grond plascheir ed am mutivescha. La va propi firtg grond tschaffen da far provas cun els e da preparar texts e choreografias.» E veteris vignan igls concerts: «Igl è mingamaing igl punct culminont. Concerts datan anavos schi bier. E chegl vala prubblamaing er per igls infants.»

Aint igl decurs digl onn da scola n'è igl concert igl zarcladour (varda box) dantant betg igl suler punct culminont per La Bargeda gronda. Dad Anzainsas pò la gruppa da cant numnadamaing er ad en camp da cant a Locarno. Igl taimp aint igl Tessin vigna a cuzzar quatter deis ed a cumpliglier duple tgi «angal» cant. Igl mument s'antopa La Bargeda gronda dantant puse eneda l'emda a Savognin per cantar ed andronaneir lour repertori – e gist scu tg'igl ò nom ainten «99 Luftballons», pon las giovnas ed igls giovens cantadours der ois: «Hast du etwas Zeit für mich? Dann singe ich ein Lied für dich – von 99 Luftballons...»



Igl scolars e scolaras on duvro igls balluns per neir an muvimaing e cantar aint.

Bargeda gronda e pitschna

La Scuola da musica Grischun Central porchas siva da prest quatter onns igl chor d'infants La Bargeda sot la bargetta da Maria Capeder. Scu tgi la dirigenta e scolasta dalla Scuola Surses ò detg, egl dantant igl ampremonn tgi dat dus gruppas: «La Bargeda pitschna è per infants dalla sagonda scoligna anfignen la terza primara. Cò egl an tot 23 infants. Ainten La Bargeda gronda cantan scolaras e scolars anfignen la sagonda secundara. E chels en totalmaing an 25 infants.» Igl interess da cantar è damai grond. La porscheida tg'è stada deditegida urindamaing a tot igls scalems dalla scola primara è numnadamaing voluntaria, scu tgi la dirigenta ò explitgia.

Tgi tgi less vaseir u bagn tadlar, scu tgi Las Bargedas cantan, stò dantant aver anc en po pazientzga. Igl proxim concert è planis per igls 12 da zarcladour 2025 allas 19.00 a Riom. (fmr/vit)



Maria Capeder è la dirigenta digl chor d'infants La Bargeda.

TEIR

Anc 105 tiradours cun ena licenza

La staschung da teir 2025 scumainza an Surmeir alla fegh d'avregl a Rona cuagl teir singul e da gruppas. A la radunanza da delegos digl District da teir Alva-Surses da marde seira è er Nik Bleuler sto preschaint.

GION NUTEGN STGIER/FMR

A Solas ainten l'ustareia «Solisbruck» èn sa radunos marde seira igls delegos dallas treis uniuns da teir digl District da teir Alva-Surses. Chel district è egn da 9 districts tgi appartagnan all'Uniu da teir cantunala (BSV). President digl District da teir Alva-Surses è gio passa 20 onns Leonard Gruber da Farrera.

El ed er igls delegos on gia plascheir tgi Nik Bleuler, igl president dall'uniu tgi reunescha igls radond 4500 tiradours e tiradours digl Grischun è sto preschaint. All'antschatta dalla radunanza generala è nia sa regurdo a dus miritevels tiradours tg'on presto blera lavour pigl District da teir Alva-Surses e tg'on banduno igl davos onn chest mond. Chegl èn Theodor Accola da Filisour e Marino Andreotti da Surava.

Benno Gruber e Severin Torsten campions digl district

Per grondas discussiuns on las tractandas statutaricas betg caschuno. Igl onn da gestiun digl district sera cun en pitschen deficit da 420 francs. Tiers tgi igl interess pigl teir activ è igls davos onns sa diminaua, on las treis uniuns da teir da Surmeir tuttegn anc 105 tiradours e tiradours cun ena licenza. Tenor uniu èn chegl: Tiradours da sport Alva 52, Uniu da teir Surses 36 ed Uniu da teir Mot 17. Scu adegna è er nias undros dalla radunanza digl district igls tiradours e las tiradours tgi retschavan la schinumnada «Feldmeisterschaftsmedaille». L'emprema medaglia, 8 cartas da teir on retschet Roland Giovanoli da Beiva e Severin Torsten da Savognin. La terza medaglia, 24 cartas, survign Ursula Hunger da Mot tgi stat a Tusang. La medaglia grischuna, 32 cartas retschava Romeo Polena da Savognin. Campions digl district en nias igl 2024 cun l'arma da standard Benno Gruber da Farrera cun 290 puncts ed ainten la categoria D/E Severin Torsten da Savognin cun 285 puncts.



Nik Bleuler (san.), igl president dall'Uniu da teir cantunala, e Leonard Gruber, igl president digl District da teir Alva-Surses.

FOTOGRAFIA GION NUTEGN STGIER

Pleds d'angraztgamaing

Nik Bleuler è sa drizzo agls delegos ed allas persungas tgi magnan igl District da teir Alva-Surses cun pleds d'angraztgamaing. Igl president digl BSV ò detg a preschaints e preschaintas: «Sainza voss grond angaschamaing fissan las uniuns da teir bagnspert betg ple existentas.» I vigna fatg gronda lavour per mantegnir las uniuns da teir e chegl scia er igl cass tar las treis uniuns da teir tgi dat an Surmeir. Chegl tgi pertotga las gruppas da matscheurs digl BSV seia realitad tgi chels vignan adegna pi vigls ed i mantgan igls giovens per las gruppas da matsch. Nik Bleuler ò suppligia agls delegos da sustigneir igl BSV cun persader tiradours giovens d'esser ena part dallas gruppas da matscheurs.

FILISUR

Il pur Marcel Heinrich vegn undrà

Mintg'on vegnan elegids ils 50 pli innovativs manaschis purils da tut l'Europa. Quest onn èn trais manaschis svizzers stads tranter ils top 50, tranter auter er il manaschi da Marcel Heinrich. Ses bain puril Las Sorts a Filisur tutga tar ils 50 megliers bains da l'Europa, sch'i va per l'agricultura regenerativa. Sin ses bain puril sa basa Marcel Heinrich sin l'utilisaziun multifara dal terren tant sur sco era sut terra. El cumbinescha differentas spezias da plantas per cumbatter parasits e per promover la microbiologia dal terren. Uschia semna el per exempel fava ensemen cun arveglia. L'arveglia attira il bau da fava e protegia uschia la fava sezza.

30–50% dals funs sin quest mund valan sco degenerads, tenenza creschenta. Per cumbatter quest svilup empova la scienza, dantant era purs e puras, da chattar novas metodos per lavar cun e betg cunter la natira. «Agricoltura regenerativa» è qua in impurtanta filosofia. Per promover quest pensar datti dapi dus onns l'organisasiun «Top 50 Farmers». (rtt/fmr)